

**COMISIÓN INFORMATIVA DE ADMINISTRACIÓN PROVINCIAL,
TRANSPARENCIA E EMERXENCIAS**

ACTA da mencionada comisión informativa, correspondente ao día **17 de abril de 2024**

Ás 16.30 horas do día 17 de abril de 2024, reúnese a Comisión Informativa de Administración Provincial, Transparencia e Emerxencias, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D. Rosendo Luis Fernández Fernández

D.^a Marta Nóvoa Iglesias

D.^a Patricia Torres Madureira

D. Xosé Miguel Pérez Blecua

D. Manuel Seoane Rodríguez

Deputados/as do Grupo Socialista:

D. Álvaro Vila Araújo

D.^a Susana Rodríguez Estévez

D. Emilio Luís Díaz Vidal

D. Aurentino Alonso Araújo

Deputados/as do BNG:

D.^a María José Mangana Guede

D. Bernardo Varela López

Deputados de Democracia Ourensana:

D. Antonio Fernández Martín

D. Gonzalo Pérez Jácome

Secretario: D. Juan Marquina Fuentes Fuentes

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á DO DÍA 13 DE MARZO DE 2024.-

A Secretaría Xeral deu traslado do borrador da acta da sesión anterior, correspondente á ordinaria do día 13 de marzo de 2024.

Non se producen intervencións e, por unanimidade, a comisión adopta o seguinte acordo:

Aprobar a acta da sesión ordinaria da Comisión Informativa de Administración Provincial, Transparencia e Emerxencias do día 13 de marzo de 2024, conforme co borrador elaborado pola Secretaría Xeral.

2º.- MODIFICACIÓN DA DATA DE REALIZACIÓN DAS COMISIÓNS INFORMATIVAS PERMANENTES DO MES DE MAIO DE 2024.-

O Sr. secretario expón o contido da proposta.

Non se producen intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

Modificar a data de realización das comisións informativas correspondentes ao mes de maio de 2024, que terán lugar todas o día 23, xoves, a partir das 16.30 horas, e coa seguinte orde:

Transparencia e Administración Provincial

Especial de Contas, Facenda e Economía

Cooperación, Infraestruturas e Medio Rural

Reto Demográfico, Igualdade, Benestar e Emprego

Termalismo, Turismo e Medio Ambiente

Cultura, Deportes e Mocidade.

3º.- APROBACIÓN DEFINITIVA DO PLAN ESTRATÉXICO DE SUBVENCÍONS 2024-2027.-

O Sr. secretario expón o contido da proposta da Presidencia.

Dª. Marta Novoa Iglesias, do Grupo Popular, indica que se trata de aprobar definitivamente o Plan, xa aprobado polo Pleno, que foi sometido ao trámite de información pública e no que presentaron alegacións o Grupo Socialista e o BNG. Engade que a proposta do Grupo de Goberno aceptou moitas das peticións formuladas por estes grupos, facendo un esforzo para intentar aprobar un documento consensuado para o presente mandato.

D. Bernardo Varela López, do BNG, sinala que o seu grupo presentou un total de vinte e catro alegacións das que sete se estimaron na súa totalidade, dúas parcialmente e algunhas delas teranse en conta, se ben non se incorporaron ao Plan por non ser o seu obxecto, aínda que se plasmarán nas bases dos diferentes concursos. Engade que o seu grupo é partidario de estender os procedementos de concorrência competitiva sempre que sexa posible. Tamén quere mostrar o seu agradecemento ao Grupo de Goberno por integrar parte das súas propostas.

D. Aurentino Alonso Araujo, do Grupo Socialista, agradece tamén que o Grupo de Goberno intentara integrar as dúas alegacións do seu grupo que motivaron unha nova redacción ás previsións do plan relativas ás subvencións para os conservatorios profesionais de música das entidades locais e ás previsións relativas ás subvencións do INORDE para subvencións de empresarios e comerciantes.

Para finalizar pide que se contemple nas subvencións destinadas a infraestruturas deportivas a preferencia de concellos que contén con escolas de deporte base proposta polo BNG, se ben pide que se amplíe para os concellos que teñen estas escolas a través de convenios ou subvencións con clubs deportivos.

D^a. Marta Novoa Iglesias, do Grupo Popular, indica respecto a esta última observación do Grupo Socialista que se incorporará ao Plan Estatístico de Subvencións.

Non se producen máis intervencións e co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte da Xunta de Goberno, do seguinte acordo:

1º.- Estimar as alegacións con números 2, 5, 9, 11, 14, 16 e 17 presentadas polo grupo provincial do **BNG** no seu escrito con **NRE 10133**, polos seguintes motivos:

. Alegación núm. 2: Esta alegación ten por obxecto modificar os obxectivos establecidos na liña D.1. Cooperación ás obras e servizos de competencia municipal, propondo a modificación da letra a), que ten como obxectivo garantir un nivel mínimo de investimento en infraestruturas de titularidade municipal, en particular nas relacionadas cos servizos mínimos obrigatorios, incrementando de forma moi significativa o nivel de investimento dos últimos anos a través do Plan de Cooperación, engadindo “co obxectivo de acadar o 25% do orzamento da Deputación ao final do actual mandato”. Considerando que se expón como unha vontade a acadar, que se comparte, e que en todo caso esta queda suxeita ás disponibilidades

orxamentarias da Deputación, acéptase a alegación presentada, pasando a ter a seguinte redacción:

a) Garantir un nivel mínimo de investimento en infraestruturas de titularidade municipal, en particular nas relacionadas cos servizos mínimos obrigatorios, incrementando de forma moi significativa o nivel de investimento dos últimos anos a través do Plan de Cooperación, co obxectivo de acadar o 25% dos créditos iniciais do orzamento da Deputación ao final do actual mandato.

. **Alegación núm. 5:** Solicita tamén dentro do Plan de acción da liña D.1, modificar o apartado VIII, relativo aos convenios de cooperación coa Confederación Hidrográfica Miño-Sil e concellos da provincia para diversas actuacións en infraestruturas (abastecemento, saneamento e/ou depuración), engadindo a previsión de poder conveniar coa CH do Douro.

A alegación considérase procedente e oportuna, razón pola que se acolle a petición, quedando redactado do seguinte xeito:

VIII. Convenios de cooperación coa Confederación Hidrográfica Miño-Sil e a Confederación Hidrográfica do Douro, e concellos da provincia para diversas actuacións en infraestruturas (abastecemento, saneamento e/ou depuración).

Establécese a posibilidade de conveniar coa Confederación Hidrográfica do Miño-Sil e a Confederación Hidrográfica do Douro, nos termos que se establezan, achegas cuxo destino sexa o investimento en infraestruturas municipais, razón pola que se inclúen na liña de cooperación ás obras e servizos municipais. Estas subvencións complementan o seu financiamento coas achegas da Confederación Hidrográfica con fondos propios e da Unión Europea para a creación destas infraestruturas. A regulación e condicións aplicables a estas subvencións establécese nos convenios de cooperación a través dos que se concederon, e noutros casos, establecerase nos convenios que se poidan subscribir.

. **Alegación núm. 9:** A presente alegación pretende igualmente a modificación do apartado XI do Plan de acción da liña D.1, relativo ao Programa de conservación e mantemento do patrimonio relixioso e cultural da provincia de Ourense, CONSERVOU, no sentido de engadir que os convenios con titulares de bens patrimoniais privados serán sempre a condición de que estea aberto e sexa accesible ao público en xeral.

A alegación considérase procedente e oportuna, razón pola que se acolle a petición, quedando redactado do seguinte xeito:

. **Alegación núm. 11:** Esta alegación pretende igualmente a modificación do apartado XIII do Plan de acción da liña D.1, relativo ao Programa de cooperación para a construción, mantemento e reforma de infraestruturas deportivas, engadindo que terán prioridade os concellos que teñan escolas de deporte base.

A alegación exposta considérase procedente e oportuna, e encaixa co fomento deportivo que pretende esta Administración provincial, razón pola que se acolle a petición, quedando redactado do seguinte xeito:

XIII. Programa de cooperación para a construción, mantemento e reforma de infraestruturas deportivas.

Nos últimos anos se veñen facendo unha serie de investimentos para a construción ou reforma de infraestruturas deportivas como poden ser a construción de campos de fútbol de herba sintética.

O goberno provincial creará un programa de cooperación que regule a cooperación das actuacións nestas infraestruturas, ou alternativamente consignará subvencións nominativas para esta finalidade, podendo conveniar o co-financiamento xunto con outras administracións públicas, e dándolles prioridade aos concellos que contan con escolas deportivas municipais de deporte base.

. **Alegación núm. 14:** Esta alegación trátase dunha corrección ortográfica, substituíndo “instrumentalizar” por “instrumentar”, na Liña D2, apartado III do Plan de Acción, a cal se acepta, pasando a ter a seguinte redacción:

III. Subvencións para festivais e actos similares de marcado carácter senlleiro na provincia.

Establécese a posibilidade de instrumentar a través de diferentes subvencións nominativas a entidades locais para a organización de festivais e actos culturais análogos de marcado carácter senlleiro e consolidado no ámbito cultural da provincia.

. **Alegación núm. 16:** Solicita, dentro do Plan de acción da liña D.2, modificar o apartado V, relativo ao Convenio coa Universidade de Vigo para a realización de actividades culturais, engadindo a previsión de poder conveniar coa UNED.

A alegación considérase procedente e oportuna, razón pola que se acolle a petición, quedando redactado do seguinte xeito:

V. Convenio coa Universidade para a realización de actividades culturais

A través dun convenio coa Universidade de Vigo regularase a concesión dunha subvención nominativa, por importe máximo de 220.000,00 €, destinada a financiar a realización de

actividades culturais e de extensión universitaria no Campus de Ourense. Poderase incluír entre as finalidades subvencionadas a realización de programas de apoio á mobilidade dos estudantes do campus e a grupos de investigación do Campus de Ourense.

As concretas condicións da subvención regularanse no convenio, que deberá ser obxecto de negociación e aprobación pola Xunta de Goberno no primeiro trimestre do ano que corresponda.

Estudárase a posibilidade de conveniar en termos similares coa UNED de Ourense.

. Alegación núm. 17: Solicita, dentro do Plan de acción da liña D.2, modificar o apartado VII, relativo a subvencións nominativas a outras entidades, engadindo á Fundación Vicente Risco.

Considerando que esta planificación toma como referencia as previstas no orzamento aprobado para o exercicio do ano 2024, e resulta que esta Fundación figura como beneficiaria, estímase procedente aceptar a alegación, quedando redactado do seguinte xeito:

VII. Subvencións nominativas a outras entidades.

Detállanse a continuación algunhas das previstas no orzamento aprobado para o orzamento do ano 2024.

- *Real Academia Galega.*
- *Achega ao premio Otero Pedrayo.*
- *Fundación Eduardo Blanco Amor.*
- *Fundación Otero Pedrayo.*
- *Pen Clube de Galicia.*
- *Coral da Ruada.*
- *Fundación Insúa dos Poetas.*
- *Fundación Curros Enríquez.*
- *Fundación Carlos Velo.*
- *Liceo de Ourense.*
- *Fundación Vicente Risco.*

2º. Estimar parcialmente as alegacións con números 1 e 2 presentadas polo grupo provincial do **PS de G-PSOE** no seu escrito con NRE 9741, e **cos números 3 e 13** presentadas polo grupo provincial do **BNG** no seu escrito con NRE 10133.

. Alegación núm. 1 Grupo Socialista: Esta alegación do grupo provincial Socialista propón unha modificación no título II do Plan, letra D, apartado D1, punto 5º, epígrafe XIV, relativo

ao “Programa de cooperación con concellos menores de 20.000 habitantes titulares de conservatorios profesionais de música”, propondo o cambio de denominación, pasando de “conservatorios profesionais de música” a “conservatorios oficiais municipais de música”, así como unha dotación orzamentaria para este programa a través da vindeira modificación de crédito desta Deputación Provincial de Ourense con cargo ao remanente de tesourería, por importe de un millón de euros (1.000.000,00 €), cantidade que se manterá nos vindeiros exercicios orzamentarios.

Con respecto á denominación dos destinatarios do programa, a denominación oficial é a de “Conservatorios de música e danza de titularidade das entidades locais de Galicia”, segundo dispón o Decreto 223/2010, e que lles reconece ás corporacións locais a posibilidade de crear conservatorios de música ou de danza, correspondéndolle á consellería competente en materia de educación, a autorización dos devanditos centros que, en todo caso, deberán reunir as condicións establecidas no Real decreto 303/2010, do 15 de marzo, polo que se establecen os requisitos mínimos dos centros que impartan ensinos artísticos regulados na Lei orgánica de educación.

Ademais do anterior, é vontade desta Deputación que a cooperación cos concellos neste ámbito se dirixa unicamente aos conservatorios dependentes dos concellos de menos de 20.000 habitantes. Para estes efectos, na modificación orzamentaria 1/2024 (SC e CE 1/2024), prevese unha consignación de subvencións nominativas que se someterá á decisión do pleno co seguinte detalle:

BENEFICIARIO	OBXECTO	IMPORTE
Conservatorio de música titularidade do Concello de O Barco de Valdeorras	Gastos de funcionamento	40.000,00 €
Conservatorio de música titularidade do Concello de O Carballiño	Gastos de funcionamento	40.000,00 €
Conservatorio de música titularidade do Concello de Ribadavia	Gastos de funcionamento	40.000,00 €
Conservatorio de música titularidade do Concello de Verín	Gastos de funcionamento	40.000,00 €
Conservatorio de música titularidade do Concello de Xinzo de Limia	Gastos de funcionamento	40.000,00 €

A razón da inclusión como nominativas no presente exercicio orzamentario ven motivada pola ausencia de crédito no orzamento corrente e a dificultade que suporía agardar a entrada en vigor da modificación orzamentaria e posterior tramitación dun programa de cooperación cos concellos, en réxime de concorrència competitiva. Óptase por esta solución transitoria para garantir esta primeira e importante achega no exercicio de 2024, para, en posteriores exercicios, proceder a tramitar un programa de cooperación que poida valorar diferentes criterios para a concesión das axudas (número de alumnos, ensinanzas impartidas e outros).

Polo anterior dáselle unha nova redacción do parágrafo, que pasaría a ter a seguinte redacción:

XIV. Programa de Cooperación con concellos menores de 20.000 habitantes titulares de Conservatorios profesionais de Música.

Na nosa provincia temos un conxunto de concellos con “Conservatorios de Música” dependentes, que ofrecen ensinanza regrada e unha serie de titulacións oficiais en grados profesionais de musica en diferentes modalidades.

Estes Conservatorios de Musica de titularidade municipal, organizan, coordinan e imparten as ensinanzas conducentes á obtención de títulos, diplomas e certificados oficiais que fosen ou sexan autorizados, no ámbito das súas competencias pola Consellería de Educación e Ordenación Universitaria, organismos e institucións competentes.

O mantemento desta actividade supón un esforzo económico e organizativo para os concellos titulares, atendendo ademais a alumnos doutros concellos converténdose en actividades comarcais. O deber do goberno provincial é colaborar coa conservación destes conservatorios e axudar ao fomento e mantemento destas actividades de recoñecido beneficio social e educativo.

A partir do exercicio de 2024, en que se fará unha primeira achega mediante subvención nominativa a cada un deles, elaboraranse unhas bases reguladoras para estas axudas de maneira que se teña en conta alumnos atendidos, modalidades ofertadas e outras variables que se poidan ter en conta.

. Alegación núm. 2: Nesta segunda alegación propónse unha redacción alternativa no título II, letra D, apartado D6, punto 5º, no seu epígrafe IV “Outras subvencións nominativas do INORDE para o desenvolvemento económico”.

Na redacción do PES aprobado inicialmente figuraban neste apartado subvencións nominativas á Federación de Comercio de Ourense, Asociación Centro Comercial Aberto de Ourense e á Confederación de Empresarios de Ourense. As dúas primeiras deben ser

eliminadas desta previsión, pois non figuran con este carácter no orzamento do INORDE para o exercicio de 2024, nin na planificación prevista, xa que o obxecto de ambas ten encaixe no concurso de subvencións para o financiamento de accións de dinamización e promoción do comercio local realizadas por asociacións de comerciantes da provincia de Ourense e por asociacións empresariais municipais ou comarcais da provincia de Ourense das que formen parte os comerciantes, que anualmente convoca o propio INORDE. A única subvención nominativa que se prevé é a destinada á CEO, que entendemos xustificada por tratarse dunha entidade integrada por 80 asociacións empresariais e que engloba unha cifra próxima a 10.000 empresas, aglutinando con isto os intereses das súas asociacións e empresas, e das que actúa como representante e actor principal para fomentar a competitividade do tecido empresarial da provincia.

En todo caso, na liña do solicitado na alegación, estímase procedente facer unha engádegas no senso de potenciar as subvencións en réxime de concorrencia para asociacións de comerciantes e/ou empresarios para actividades de promoción nos seus respectivos ámbitos, todo en función das dispoñibilidades orzamentarias anuais do INORDE.

A estimación parcial desta alegación leva consigo tamén a eliminación do punto terceiro dos obxectivos estratéxicos desta liña.

Polo anterior proponse a estimación parcial desta alegación, dando unha nova redacción do parágrafo, que pasaría a ter a seguinte redacción:

IV. Outras subvencións nominativas do INORDE para o desenvolvemento económico.

Por esta vía poderán subvencionarse accións que non teñan encaixe noutras convocatorias e que polo seu carácter singular supoñan un pulo e se consideren unha aposta polo desenvolvemento económico provincial, como son as previstas no orzamento deste organismo autónomo destinada á Confederación de Empresarios de Ourense, así como outras que se poidan implementar ao longo do período da planificación de xeito excepcional e por causas xustificadas.

O anterior, establécese sen prexuízo de potenciar as subvencións do INORDE en réxime de concorrencia competitiva destinadas a Asociacións de comerciantes e/ou empresarios (previstas no apartado II do Plan de acción), para actividades de promoción nos seus respectivos ámbitos, valorándose criterios relativos ao número de asociados ou o número de campañas de promoción, entre outras, todo elo en función das dispoñibilidades orzamentarias anuais do INORDE.

. **Alegación núm. 3 do BNG:** Esta alegación solicita unha modificación do apartado IV, relativo ao Programa de financiamento para construción ou reforma de infraestruturas destinadas a benestar social ou 3ª idade, dentro do Plan de acción da liña D.1, engadindo que será prioritario para concellos coa poboación máis avellentada e que só poderán acceder a estas axudas concellos nos que exista un servizo público similar.

Enténdese que a prioridade para concellos coa poboación máis avellentada é oportuna e conveniente, polo que se acepta, pero non á referencia á restrición para concellos nos que non exista previamente un servizo público similar, xa que esta restrición carece de motivación e fundamento.

Ao aceptarse parcialmente a alegación, a nova redacción é a seguinte:

IV. Programa de financiación para construción ou reforma de infraestruturas destinadas a benestar social ou 3ª idade.

Este programa de Cooperación destinarase á construción ou reforma de infraestruturas de carácter público destinadas a programas de benestar social como poden ser centros ocupacionais de discapacitados, casas comunitarias, centros de día, centros de apoio a drogodependentes, escolas, institutos, centros de formación, residencias xeriátricas de 3ª idade e infraestruturas que sexan de ben social. Neste programa a Deputación achegará o importe necesario e dispoñible, dándolles preferencia ás actuacións que sexan co-financiadas polos concellos ou outras administración e á actuación dos concellos coa poboación máis avellentada.

Este programa estará dotado nos orzamentos do ano 2024 da cantidade de 500.000€.

. **Alegación núm. 13 do BNG:** Esta alegación pretende igualmente a modificación do apartado XIV do Plan de acción da liña D.1, relativo ao Programa de cooperación con concellos menores de 20.000 habitantes titulares de conservatorios profesionais de música.

Como xa se explicou na alegación núm. 2 presentada polo grupo socialista, é vontade desta Deputación que a cooperación cos concellos neste ámbito se dirixa unicamente aos conservatorios dependentes dos concellos de menos de 20.000 habitantes. Para estes efectos, na modificación orzamentaria 1/2024 (SC e CE 1/2024), prevese unha consignación de subvencións nominativas que se someterá á decisión do pleno co seguinte detalle:

BENEFICIARIO	OBXECTO	IMPORTE
Conservatorio de música titularidade do Concello de O Barco de Valdeorras	Gastos de funcionamento	40.000,00 €

Conservatorio de música titularidade do Concello de O Carballiño	Gastos de funcionamento	40.000,00 €
Conservatorio de música titularidade do Concello de Ribadavia	Gastos de funcionamento	40.000,00 €
Conservatorio de música titularidade do Concello de Verín	Gastos de funcionamento	40.000,00 €
Conservatorio de música titularidade do Concello de Xinzo de Limia	Gastos de funcionamento	40.000,00 €

A razón da inclusión como nominativas no presente exercicio orzamentario ven motivada pola ausencia de crédito no orzamento corrente e a dificultade que suporía agardar a entrada en vigor da modificación orzamentaria e posterior tramitación dun programa de cooperación cos concellos, en réxime de concorrência competitiva. Óptase por esta solución para garantir esta primeira e importante achega no exercicio de 2024, para, en posteriores exercicios, proceder a tramitar un programa de cooperación que poida valorar diferentes elementos (número de alumnos, ensinanzas impartidas e outros).

Ao aceptar parcialmente a alegación dáse unha nova redacción do parágrafo, que pasaría a ter a seguinte redacción:

XIV. Programa de Cooperación con concellos menores de 20.000 habitantes titulares de conservatorios profesionais de musica.

Na nosa provincia temos un conxunto de concellos con “Conservatorios de Música” dependentes, que ofrecen ensinanza regrada e unha serie de titulacións oficiais en grados profesionais de musica en diferentes modalidades.

Estes Conservatorios de Musica de titularidade municipal, organizan, coordinan e imparten as ensinanzas conducentes á obtención de títulos, diplomas e certificados oficiais que fosen ou sexan autorizados, no ámbito das súas competencias pola Consellería de Educación e Ordenación Universitaria, organismos e institucións competentes.

O mantemento desta actividade supón un esforzo económico e organizativo para os concellos titulares, atendendo ademais a alumnos doutros concellos converténdose en actividades comarcais. O deber do goberno provincial é colaborar coa conservación destes conservatorios e axudar ao fomento e mantemento destas actividades de recoñecido beneficio social e educativo.

A partir do exercicio de 2024, en que se fará unha primeira achega mediante subvención nominativa a cada un deles, elaboraranse unhas bases reguladoras para estas axudas de maneira que se teñan en conta alumnos atendidos, modalidades ofertadas e outras variables que se poidan ter en conta.

3º. Desestimar as alegacións con números 1, 4, 6, 7, 8, 10, 12, 15, 18, 19, 20, 21, 22, 23 e 24, presentadas polo grupo provincial do BNG no seu escrito con NRE 10133, polos seguintes motivos:

. **Alegación núm. 1:** Nesta primeira alegación do grupo do BNG, propónse modificar a redacción do ámbito de aplicación e alcance das determinacións do Plan, no sentido de que as desviacións detectadas respecto ás previsións do plan serán recollidas no informe de avaliación para coñecemento do Pleno, engadindo tamén a súa aprobación.

Entendemos que esta alegación debe ser desestimada, xa que a Ordenanza xeral de subvencións desta Deputación, a Lei xeral de subvencións e a Lei de subvencións de Galicia non contemplan o trámite proposto de aprobación da avaliación da planificación. Neste sentido, é o propio Plan o que instrumenta esta avaliación, mediante un informe que se elabora á finalización do seu ámbito temporal e que debe servir, como indica o propio plan, para a futura planificación, sen que sexa precisa a súa aprobación por ningún órgano de goberno provincial, en particular polo pleno.

. **Alegación núm. 4:** Solicita tamén dentro do Plan de acción da liña D.1, modificar o apartado V relativo ao Programa provincial de asistencia técnica, económica e xurídica aos concellos e mancomunidades en materia de servizos sociais comunitarios (BenOurense), engadindo no relativo á contratación de persoal técnico dos equipos municipais de servizos sociais comunitarios, o parágrafo “...con criterio de transparencia, mérito e capacidade...”.

A modificación proposta ven xa prevista de seu na lexislación de emprego público aplicable ás contratacións ou nomeamentos de persoal que realicen as EELL, e non lle corresponde a esta Deputación fiscalizar os ditos procesos selectivos, razón pola que non se acepta a referida alegación.

. **Alegacións núms. 6 e 7, de tratamento conxunto:** Estas dúas alegacións solicitan incluír nos apartados IX e X do Plan de acción da liña D.1, relativos a subvencións nominativas, unha referencia a que se priorice aos concellos que no histórico dos últimos dez anos menos recibiran.

Este grupo de goberno entende que a planificación, xestión e concesión de subvencións que fixeron os anteriores gobernos provinciais non debe condicionar a planificación actual e futura deste novo goberno, a cal ven marcada polo cambio de dirección que supón a aprobación do novo Plan CooperOU, razón pola que non se considera oportuno a inclusión do criterio proposto.

. Alegación núm. 8: A presente alegación pretende a modificación do apartado XI do Plan de acción da liña D.1, relativo ao Programa de conservación e mantemento do patrimonio relixioso e cultural da provincia de Ourense, CONSERVOU. Neste regúlase unha comisión paritaria de análise e decisión dos bens sobre os que se actuará, e que estará formada por membros das institucións asinantes dos convenios e técnicos que orientarán sobre as actuacións para realizar. A alegación solicita que na referida comisión participen todos os grupos políticos da Deputación.

Dada a composición prevista para esta comisión (Deputación, Xunta, Estado, Bispados), considérase que esta Deputación debe concorrer cunha única voz e voto, todo isto sen prexuízo de atender as suxestións que os grupos provinciais poidan formular e dando conta das reunións que se realicen.

. Alegación núm. 10: Esta alegación pretende igualmente a modificación do apartado XII do Plan de acción da liña D.1, relativo ao Programa de cooperación para a adquisición de mobiliario público aos concellos da provincia, engadindo que o mobiliario debe ter en conta o entorno, para non considerar feísmo, e ter en conta as necesidades das persoas con diversidade funcional.

As peticións formuladas considéranse acaídas, e estas deben ser tidas en conta á hora de contratar as subministracións deste mobiliario, se ben non se considera procedente a súa inclusión neste plan estratéxico, debendo ser as prescricións técnicas que detallen o mobiliario as que especifiquen as súas características técnicas, cores, materiais e empregar etcétera.

. Alegación núm. 12: Esta alegación pretende igualmente a modificación do apartado XIII do Plan de acción da liña D.1, relativo ao Programa de cooperación para a construción, mantemento e reforma de infraestruturas deportivas, engadindo que terán prioridade os concellos nos que o investimento se realice por primeira vez.

Respecto a esta alegación, e como xa se dixo, este grupo de goberno entende que a planificación, xestión e concesión de subvencións que fixeron os anteriores gobernos

provinciais non debe condicionar a planificación actual e futura deste novo goberno, razón pola que non se considera oportuno a inclusión do criterio proposto.

. **Alegación núm. 15:** Esta alegación trátase dunha adición na Liña D2, apartado IV do Plan de Acción, relativo ao Concurso de subvencións para realización de actividades culturais e recreativas. A adición proposta consiste na introdución dun parágrafo que di “...establecerase unha liña de axudas por concorrència competitiva para as actividades lúdicas de recoñecido impacto na provincia, tales como festas de interese turístico, con criterios de duración, número de participantes...”.

Sobre esta alegación, e posto que se trata dunha convocatoria de axudas dirixida exclusivamente a entidades sen ánimo de lucro, e a través do procedemento de concorrència competitiva para realización de todo tipo de actividades culturais ou recreativas, debemos sinalar que se ben se comparte o espírito e o fondo desta, deben ser as bases reguladoras do procedemento as que recollan as observacións realizadas, as cales se consideran oportunas, especialmente á referencia a eventuais declaracións das festas como de interese turístico.

. **Alegación núm. 18:** Esta alegación afecta á liña D.3 (fomento do deporte), engadíndolle ao encabezado do Plan de Acción que as subvencións que integran esta liña de actuación instrumentaranse a través das seguintes accións, tendo sempre en conta que os beneficiarios de subvencións nominativas non poderán ser beneficiarios de subvencións de concorrència competitiva.

Sobre o contido da alegación, se ben se comparte o seu fondo, entendemos que non pode aceptarse unha redacción formulada de xeito xenérico, xa que é posible que unha mesma entidade ou club poida ser beneficiario polas dúas fórmulas indicadas (concorrència e nominativa), sempre que non exista identidade no obxecto.

Ademais, unha previsión en termos similares, xa se recolle no concurso de subvencións para entidades deportivas, onde a cláusula décimo sexta sinala que “...*As subvencións concedidas ao abeiro desta convocatoria son compatibles con outras axudas ou subvencións públicas, concedidas por administracións distintas da propia Deputación de Ourense ou do seu organismo autónomo, o INORDE, para os mesmos gastos ou por entidades ou empresas privadas, sempre que o conxunto das ditas axudas non exceda do 100% do gasto da actividade subvencionada. Así mesmo, estas subvencións tamén serán compatibles con outras subvencións concedidas pola Deputación Provincial de Ourense ou do seu organismo autónomo, o INORDE, sempre que se concederan a través de procedementos de concorrència*

competitiva e sempre que o conxunto das ditas axudas non exceda do 100% do gasto da actividade subvencionada... ”.

. **Alegacións números 19 e 20, de tratamento conxunto:** Estas dúas alegacións afectan á liña D.3 (fomento do deporte), propondo que no apartado II do Plan de Acción, relativo á subvención cuxo beneficiario é o Club Ourense Baloncesto, se engadan como condicións o uso do idioma galego no material gráfico e nas locucións dos eventos deportivos, e que este club deba participar en eventos sociais que lle requira a Deputación de Ourense.

Se ben as observacións realizadas se consideran axeitadas e procedentes, estímase conveniente fixar as condicións no acordo de concesión das subvencións, e tendo en conta no relativo ao emprego da lingua galega, que se formulará unha recomendación (que non obrigación) neste sentido, consonte coas competencias atribuídas a esta Administración pola Lei de normalización lingüística de Galicia e a Lei de administración local de Galicia.

. **Alegación núm. 21:** Nela solicitan a eliminación do apartado VIII (outras subvencións nominativas), co seguinte tenor literal: En función das solicitudes e necesidades detectadas na provincia prevese que esta liña se manteña ao longo do período da presente planificación, co obxectivo de acoller determinadas demandas que non teñan encaixe noutras liñas ou formas de financiamento, así como cooperar cos clubs da provincia que destaquen e compitan en ámbitos superior ao autonómico e requiran de maior apoio institucional.

Enténdese que a inclusión deste apartado dentro da planificación do fomento do deporte é oportuna e axeitada. Sen prexuízo de que no período 2024-2027 se trate de potenciar economicamente o concurso de subvencións para entidades deportivas tramitado polo procedemento de concorrência competitiva, dotando a este de maior orzamento, e incluso establecer unha nova liña destinada a clubs semiprofesionais ou profesionais que compitan en categoría de ámbito nacional, estímase oportuno deixar a previsión do apartado VIII para atender a necesidades excepcionais que poidan xurdir ou que teñan difícil encaixe nos procedementos de concorrência.

. **Alegación núm. 22:** Na presente alegación, relativa á liña D4 (reto demográfico), no apartado II, relativo ao Programa EmprendOU, preténdese substituír o procedemento de concorrência non competitiva polo de concorrência competitiva.

Respecto a esta alegación debemos sinalar que este Programa, o cal está financiado exclusivamente con fondos propios da Deputación Provincial de Ourense, contempla a tramitación das subvencións polo procedemento de concorrência non competitiva. Desta

forma é posible manter aberto un amplo prazo para posibilitar a obtención de subvencións con cargo a este Programa. Optar por un réxime de concesión das subvencións en concorrència competitiva implicaría ter que dar un prazo acoutado para a presentación de solicitudes e considerar a comparación entre aquelas que soliciten en tempo e forma as axudas, coa necesidade de facer unha comparación e ponderación, ata a concesión das axudas e posterior pago destas. O sistema previsto actualmente nas bases reguladoras permite outorgar unha axuda equiparable cun primeiro ingreso de salario, tomándose como referencia a contía do SMI, para aquelas emprendedoras que se estean iniciando. Defínese un procedemento para a súa obtención moi sinxelo e realízase o trámite administrativo de concesión e pago en sete (7) días. Con isto perséguese que a emprendedora teña este primeiro ingreso case de forma inmediata. Por outro lado, manter o crédito aberto permite que as iniciativas emprendedoras teñan posibilidade de optar a esta axuda durante todo o ano. Todo isto fai que se considere importante esta posibilidade de presentación de solicitudes todo o ano, xa que que as canles de información para o emprendemento non sempre son fáciles de localizar, e máis no caso de axudas certamente novidosas, como esta. Este grupo de goberno, co asesoramento as área de Benestar, entende que limitar prazos para presentación das axudas podería excluír a moitas emprendedoras por falta de información, razón polo que non se acolle esta pretensión.

. **Alegación núm. 23:** Esta alegación, relativa á liña D5 (fomento do benestar social), no apartado II/, relativo ao Concurso de subvencións para fomento do termalismo social, formula unha adición dos criterios de “discapacidade e sanidade” como criterios de concesión.

Respecto disto, debemos ter presente que as bases do ano 2024 recollen como novidade o programa de “termalismo inclusivo” que ven sumarse aos programas de termalismo social e cultura termal que se levan desenvolvendo nos últimos dez anos. A este programa de “termalismo inclusivo” poderán optar todas aquelas persoas que teñan diversidade funcional, sendo a súa finalidade adaptar as terapias termais aos condicionantes sanitarios ou convivenciais que tales colectivos precisen para poder acceder a estas instalacións e/ou terapias en condicións de seguridade e de alto benestar. Debemos ter en conta que as instalacións termais teñen consideración de centros sanitarios e as posibilidades de acceder ás súas terapias teñan condicionantes neste sentido. Por isto é polo que, no ano 2024, se regula un programa concreto e coas especificidades necesarias para que as persoas con discapacidade poidan acceder. Ademais deste programa dirixido a colectivos con discapacidade, recóllese igualmente nas bases reguladora o “Programa termal contra a soidade non desexada”, co fin

de que de forma colectiva, reiterada a extensa no tempo, as persoas que cumpran tales características teñan un programa termal e social para combater a soidade non desexada. Polo exposto considérase que os criterios propostos xa están recollidos nos concursos e programas desta liña D5.

. **Alegación núm. 24:** Nesta alegación, relativa á liña D6 (Fomento do desenvolvemento económico da provincia), solicítase a cuantificación dos apartados II, III e IV, relativos ao Concurso de subvencións para o financiamento de accións de dinamización e promoción do comercio local realizadas por asociacións de comerciantes da provincia de Ourense e por asociacións empresariais municipais ou comarcais da provincia de Ourense das que formen parte os comerciantes, a. Subvención á Fundación Feiras e Exposicións de Ourense (Expourense), e outras subvencións nominativas do INORDE para o desenvolvemento económico.

Sobre esta debemos indicar que a punto II xa aparece cuantificado economicamente no orzamento do INORDE (e integrado no orzamento xeral provincial), ao igual que debe suceder coa subvención nominativa para a Fundación Feiras e Exposicións de Ourense e calquera outra que se poida prever. Considerase oportuno que a planificación non recolla e concrete os importes, debendo ser en todo caso o Consello Reitor do organismo autónomo INORDE en primeiro lugar, e o Pleno provincial en segundo lugar, os que, en virtude dos acordos de aprobación dos orzamentos do Instituto e dos orzamentos provinciais, os que decidan en cada exercicio as subvencións e o seu importe, e que teñan inclusión nestas liñas.

4º.- Aprobar definitivamente o Plan estratéxico de subvencións da Deputación Provincial de Ourense e do INORDE para o período 2024-2027, co seguinte contido:

-PLAN ESTRATÉXICO DE SUBVENCIONES DA DEPUTACIÓN PROVINCIAL DE OURENSE E DO INORDE PARA O PERIODO 2024-2027.

I. MEMORIA XUSTIFICATIVA

A vixente Ordenanza xeral de subvencións da Deputación Provincial de Ourense, cuxo texto consolidado aprobado definitivamente se publicou no BOP núm. 260 de data 12.11.2015 establece no seu Título III (artigos 12-14), baixo a rúbrica “do plan estratéxico de subvencións”, a obriga desta Deputación de elaborar e aprobar un plan estratéxico de subvencións, como instrumento de planificación das políticas públicas que teñan por obxecto o fomento de actividades de utilidade pública ou interese social, co contido mínimo e réxime de tramitación, aprobación, seguimento e avaliación alí recollido.

Nesta Ordenanza provincial atópase unha regulación específica da planificación estratéxica das subvencións provinciais, contida no seu citado Título III, regulación que intenta adaptar ás peculiaridades da Administración provincial a regulación xeral contida con carácter xeral nos artigos 8 da Lei 38/2003 xeral de subvencións e 4 da Lei 9/2007 de subvencións de Galicia, que carecen dun desenvolvemento regulamentario específico para as entidades locais.

Entre outros aspectos, o Título III da Ordenanza provincial recolle expresamente no seu artigo 12 o carácter preceptivo dos plans estratéxicos como requisito previo para a concesión de subvencións, carácter que viña recollido nos artigos citados da lexislación estatal e autonómica e que foi interpretado pola xurisprudencia do Tribunal Supremo, en sentenzas do 26 de xuño e 4 de decembro de 2012, e recentemente na sentenza de 9 de maio de 2022, do seguinte xeito “...o Plan Estratéxico de Subvencións constitúe un instrumento de planificación de políticas públicas que teñan como obxectivo o fomento dunha actividade de utilidade pública ou interese social ou de promoción dunha finalidade pública, cuxa aprobación, con carácter previo á regulación da subvención, resulta esixible, de conformidade co disposto no artigo 8.1 da Lei 38/2003, do 17 de novembro, xeral de Subvencións, e o artigo 10 do Real decreto 887/2006, do 21 de xullo, polo que se aproba o Regulamento de desenvolvemento da citada Lei xeral de subvencións, de onde se infire que se configura como un requisito esencial do procedemento subvencionado...”, e que “...dado o teor dos apartados 1 e 3 do artigo 8 e da Disposición adicional 13ª da Lei 38/2003, o Plan Estratéxico ao que se refire ten carácter previo ao establecemento de calquera subvención, constituíndo un requisito esencial cuxo cumprimento esixe que sexa formalizado externamente e cun contido que o faga identificable como tal por reflectir polo menos aquilo ao que alude o apartado 1 dese artigo 8...”.

En consecuencia, a aprobación dun plan estratéxico, co contido e obxectivos sinalados na ordenanza, resulta unha necesidade ineludible para posibilitar a concesión de subvencións nos vindeiros exercicios tanto por parte da Deputación como por parte do INORDE.

No relativo ao ámbito temporal, unha adecuada planificación estratéxica esixe, non só un ámbito obxectivo e subxectivo adecuado, senón unha extensión temporal que permita que esta despreague todos os seus efectos. En tal sentido, o art. 11.4 do RD 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións dispón que os plans estratéxicos conterán previsións para un período de vixencia de tres (3)

anos, salvo que pola especial natureza do sector afectado, sexa conveniente establecer un plan estratéxico de duración diferente. Deste xeito, nada impediría a aprobación de plans estratéxicos de vixencia distinta (tanto inferior como superior) aos tres anos, aínda que iso deberá estar suficientemente motivado.

Nesta liña e como xa se fixo no mandato anterior (2019-2023), óptase por facer unha planificación a longo prazo, con perspectiva de toda a lexislatura e que abranza o presente mandato e con isto os exercicios económicos 2024, 2025, 2026 e 2027, cumpríndose en todo caso os prazos establecidos no artigo 12.2 da Ordenanza Xeral de Subvencións que establece un período de vixencia mínimo dun ano e máximo de catro.

O establecemento efectivo das subvencións previstas neste plan estratéxico require a consignación orzamentaria e a aprobación, no seu caso, das correspondentes bases da convocatoria ou, en casos específicos, o acordo ou convenio que aprobe a concesión directa. As liñas de actuación son susceptibles de incrementarse con achegas suplementarias de fondos doutras administracións ou a través das modificacións orzamentarias, sempre e cando se teña previsto na respectiva convocatoria nos termos previstos no artigo 58 do Real decreto 887/2006, do 21 de xullo polo que se aproba o Regulamento da Lei 38/2003 do 17 de novembro, xeral de subvencións.

*Polo anterior, procedeuse á elaboración do presente plan estratéxico de subvencións da Deputación Provincial e do INORDE para os exercicios **2024-2027**, co contido mínimo previsto no artigo 12.3 da repetida Ordenanza Xeral de Subvencións desta Deputación, partíndose de que este se concibe, dada a súa natureza e configuración legal, como un instrumento programático. Non obstante, establécese un nivel mínimo de vinculación co plan, en dous sentidos: en primeiro lugar, prohibindo a concesión de subvencións para liñas de acción non previstas no plan, e, en segundo lugar, establecendo unha específica obriga de motivación das desviacións que eventualmente se produzan respecto das súas previsións. Todo o anterior debera redundar nun maior control do gasto público, polo que o Plan Estratéxico debe ser un instrumento que sirva para racionalizar o exercicio da acción de fomento, de tal maneira que se poida seguir mantendo esa acción á vez que, sobre criterios de eficacia, se rendibilicen os recursos que polas circunstancias poden verse limitados.*

*O Plan estrutúrase en **SETE LIÑAS DE ACCIÓN** iniciais (**1. Cooperación coas entidades locais, 2. Fomento da cultura, 3. Fomento do deporte, 4. Reto demográfico 5. Fomento do***

benestar social, 6. Fomento do desenvolvemento económico e 7. Fomento do asociacionismo veciñal), en coherencia coas competencias provinciais e coas previsións dos orzamentos xerais da Deputación Provincial para o exercicio 2024, que foi aprobado pola Corporación Provincial na sesión plenaria de data 24.11.2023 e publicado no BOP núm. 296 de data 28.12.2023.

II. DETERMINACIÓNS DO PLAN ESTRATÉXICO DE SUBVENCIONS DA DEPUTACIÓN PROVINCIAL DE OURENSE E DO INORDE PARA O PERIODO 2024-2027.

A) Ámbito de aplicación e alcance das determinacións do Plan Estratéxico de Subvencións 2024-2027.

1. As determinacións contidas no presente plan estratéxico serán de aplicación á totalidade dos procedementos de concesión e xustificación de subvencións xestionadas e financiadas pola Deputación Provincial de Ourense e o Inorde ao longo dos exercicios incluídos no seu ámbito de aplicación.

2. En coherencia co carácter programático do plan, cuxo contido non crea dereitos nin obrigacións e queda condicionado á posta en práctica das diferentes liñas de subvención, atendendo ás disponibilidades orzamentarias do exercicio, as súas determinacións teñen o carácter de orientacións estratéxicas que deben seguirse na xestión dos procedementos correspondentes polos órganos e unidades administrativas competentes da Deputación Provincial e do INORDE. Estas orientacións estratéxicas vincularán con carácter xeral aos órganos da Deputación, nos seguintes termos:

a) Non poderán concederse subvencións para finalidades non comprendidas nas liñas de subvención previstas no presente Plan, agás nos supostos de subvencións que se concedan para a atención de situacións sobrevidas de catástrofe ou calamidade pública, ou por outras causas de interese público, ou no suposto en que xustifiquen a existencia dun título competencial contido nunha norma con rango que lei que habilite á Deputación ou aos seus entes públicos dependentes para a concesión de subvencións coa finalidade de que se trate. En ámbolos dous casos, debe motivarse esta circunstancia.

b) Porén do anterior, nos supostos en que os órganos xestores do plan consideren necesario apartarse das orientacións estratéxicas que este contén, deberán motivalo suficientemente. As desviacións respecto ás previsións do plan serán recollidas no informe de avaliación para coñecemento do Pleno.

3. Establécese a posibilidade da tramitación anticipada das diferentes liñas de subvención, condicionada, en todo caso, á aprobación definitiva do presente Plan Estratéxico de Subvencións.

B) Principios inspiradores da presente planificación estratéxica

A vixente normativa reguladora das actuacións das administracións públicas en xeral e, en particular no que atinxe ás competencias das deputacións provinciais –Lei 5/1997 de administración local de Galicia e Lei 7/1985, reguladora das bases do réxime local– establece unha serie de principios que veñen a constituír a expresión formal dos elementos definidores do presente Plan Estratéxico de Subvencións, e que constitúen a formulación das directrices xerais que deben impregnar a execución da política de subvencións da Deputación.

Xa que logo, os principios xerais en que se concretará a acción de fomento desta administración serán principalmente os seguintes:

- Igualdade, entendida como a non discriminación ou marxinación de cidadáns, administracións ou sectores.
- Asistencia e cooperación aos entes locais da provincia, configurando a acción provincial para dar resposta ás situacións e necesidades concretas de cada concello da nosa provincia de menos 20.000 habitantes e reforzando a súa autonomía e responsabilidade cunha achega económica suficiente.
- Solidariedade, entendendo a acción social como expresión da xustiza social, a redistribución e actuación dos recursos de forma equitativa e a discriminación positiva.
- Fomento da iniciativa social, dando especial importancia á colaboración das entidades privadas na xestión dos intereses que lle son propios.
- Transparencia, como a vontade desta Deputación por ter informados aos cidadáns e entidades locais das súas políticas de axudas e subvencións e de asignación dos recursos públicos.
- Cooperación entre administracións, entendida como a consecuencia do principio de corresponsabilidade na xestión dos fondos públicos.
- Garantía de bo funcionamento, regulando os requisitos, baremos obxectivos, competencias, mecanismos de participación e de control e avaliación e control das subvencións concedidas.

C) Obxectivos estratéxicos do Plan Estratéxico de Subvencións 2024-2027.

A elaboración do presente Plan Estratéxico de Subvencións debe concibirse como un exercicio que permita realizar unha auténtica planificación estratéxica das políticas públicas de contido subvencional desenvolvidas por esta.

Fronte unha concepción formal do PES, esta Deputación quere dotarse dunha auténtica ferramenta para conseguir unha maior eficacia no cumprimento dos obxectivos da actividade subvencional e unha maior eficiencia na asignación do gasto público, e para isto deben racionalizarse e, no seu caso, simplificarse, as actuacións subvencionais para desenvolver.

Tendo presente todo o anterior, a elaboración do PES pretende a consecución dos seguintes obxectivos xerais:

- 1. Dotar á Deputación dun instrumento de planificación das políticas públicas que teñan por obxecto o fomento dunha actividade de utilidade pública ou interese social relacionada coas materias da competencia desta.*
- 2. Desde unha perspectiva económico-financeira, definir instrumentos de xestión máis uniformes no conxunto das diferentes áreas e servizos que permitan mellorar a eficacia e a eficiencia das subvencións.*
- 3. Desde a perspectiva da transparencia, acceso á información pública e bo goberno, dar cumprimento á normativa aplicable nestas materias ante as novas obrigas de publicidade activa e pasiva impostas por esta.*

Os obxectivos concretos ou específicos que se pretenden, indícanse especificamente para cada liña do Plan.

D) Liñas de subvención do Plan Estratéxico de Subvencións 2024-2027.

D.1. Cooperación ás obras e servizos de competencia municipal.

1.º Áreas de competencia afectadas e sectores aos que se dirixen as axudas

Esta liña, establecida no exercicio das competencias provinciais de coordinación dos servizos municipais e cooperación e asistencia a municipios outorgadas polo artigo 36.1. apartados a) e b) da Lei de bases de réxime local, afecta ás competencias municipais nos ámbitos dos servizos mínimos obrigatorios previstos no artigo 26 da Lei reguladora das bases do réxime local, dos servizos sociais, e outros servizos e investimentos relacionados con outras competencias municipais.

O sector ao que se dirixen as axudas é exclusivamente ao das entidades locais da provincia (concellos, entidades locais menores, mancomunidades e consorcios).

2.º Obxectivos e efectos que se pretenden coa súa aplicación

Os obxectivos e efectos perseguidos co presente Plan Estratéxico, referidos ás principais áreas de competencia da Deputación Provincial, no ámbito da cooperación cos concellos e demais entidades locais, son os seguintes:

- a) Garantir un nivel mínimo de investimento en infraestruturas de titularidade municipal, en particular nas relacionadas cos servizos mínimos obrigatorios, incrementando de forma moi significativa o nivel de investimento dos últimos anos a través do Plan de Cooperación, co obxectivo de acadar o 25% dos créditos iniciais do orzamento da Deputación ao final do actual mandato.*
- b) Garantir a suficiencia financeira e a autonomía municipal dos concellos, outorgándolles unha achega anual a través do Plan de Cooperación e que poderán destinar a gastos correntes.*
- c) Prestarlles axuda financeira aos concellos en situación de insuficiencia orzamentaria.*
- d) Garantir o financiamento mínimo para o mantemento dos servizos sociais de titularidade municipal e dos puntos de atención á infancia.*
- e) Fomentar as actuacións de xestión compartida de servizos públicos locais (en especial os servizos mínimos obrigatorios) a través de consorcios, mancomunidades ou outras... con especial atención a servizos públicos de carácter deficitario ou con especiais dificultades de financiamento.*
- f) Fomento do emprego local.*

3.º Prazo necesario para a súa consecución

A concesión das subvencións correspondentes a esta liña de actuación deberá completarse como máximo antes do 1 de decembro do ano correspondente, sen prexuízo dos menores prazos establecidos nos plans, programas ou convenios específicos que a integran. A execución das actuacións subvencionadas deberá realizarse integramente nos exercicios que correspondan. Non obstante o anterior, a execución de actuacións consistentes en investimentos poderá adiarse, sempre que concorra causa xustificativa, ata a data que se determine.

4.º Custos previsibles para a súa realización e fontes de financiamento

a) Custos previsibles:

Os importes previstos inicialmente para esta liña de subvencións no orzamento do 2024 recóllense nos capítulos IV e VII do orzamento. O plan COOPEROU, como principal ferramenta de cooperación cos concellos da provincia, terá un importe inicial de

17.000.000,00 €. Nos sucesivos exercicios, obxecto da presente planificación (2025, 2026 e 2027), o obxectivo é ampliar a consignación orzamentaria da presente liña, a cal se considera esencial en termos cualitativos e cuantitativos.

b) Fontes de financiamento:

As achegas serán realizadas exclusivamente con fondos propios da Deputación Provincial. Non obstante, as entidades locais beneficiarias poderán complementar o financiamento das actuacións subvencionadas con achegas financiadas, ben sexa con fondos propios municipais, ben con fondos obtidos doutras administracións públicas ou da Unión Europea.

5.º Plan de acción

As subvencións correspondentes a esta liña xestionaranse a través dos seguintes instrumentos (e doutros que se poidan incorporar por ter encaixe nel):

I. Co Plan provincial de cooperación ás obras e servizos municipais da Deputación Provincial de Ourense “PLAN COOPEROU”

A través deste plan, canalizaranse subvencións destinadas a investimentos municipais relacionados cos servizos mínimos obrigatorios establecidos no artigo 26 da Lei de bases de réxime local, así como as subvencións para investimentos relacionados con outros servizos municipais. Ademais, o plan, se así se acorda, preverá a posibilidade de que os concellos en situación de insuficiencia orzamentaria destinen parte da subvención á amortización da súa débeda en supostos de insuficiencia financeira manifesta ou a gastos correntes relacionados cos servizos mínimos obrigatorios.

O plan conterá tamén unha achega destinada á entidade local menor de Berán.

A aprobación das bases do PLAN COOPEROU produciuse no mes de novembro do ano 2023, e sendo aprobadas no propio pleno de orzamentos para facilitar a elaboración destes nos concellos, permitindo a planificación ordenada dos fondos cos que os poderán contar.

Co Plan provincial de cooperación ás obras e servizos municipais da Deputación Provincial de Ourense para o exercicio 2024, esta Corporación Provincial trata de darlles resposta ás situacións e necesidades concretas de cada concello, reforzando a súa autonomía e responsabilidade.

O Plan provincial de cooperación pretende ser dinámico e cunha dotación económica axeitada. A achega provincial asignada a cada municipio no Plan provincial de cooperación ás obras e servizos municipais da Deputación Provincial de Ourense para o exercicio 2024, deberá distribuírse do xeito seguinte:

- O 40% da dita achega, como mínimo, destinarase a investimentos reais, consonte co disposto no Capítulo VI do Anexo III da Orde EHA/3565/2008, do 3 de decembro (modificada por Orde HAP/419/2014, do 14 de marzo), preferentemente os necesarios para a efectiva prestación dos servizos municipais obrigatorios enumerados no artigo 26 da LBRL, modificada por LRSAL. A dita achega constituirá o programa de investimentos do plan provincial.

- O 60% da dita achega, como máximo, destinarase a operacións correntes, consonte co disposto nos Capítulos I a V (ambos incluídos) do Anexo III da Orde EHA/3565/2008, do 3 de decembro e/ou a amortización ou devolución de pasivos financeiros segundo o disposto no Capítulo IX do Anexo III da Orde EHA/3565/2008, do 3 de decembro, coa finalidade de prover á correcta prestación dos servizos municipais obrigatorios. A dita achega constituirá o programa de gasto corrente e amortización de débeda do plan provincial. Neste programa, compréndense expresamente os gastos de persoal relativos a novas contratacións de persoal laboral ao ter a consideración de programa de fomento do emprego subsumible nas políticas activas de emprego desta Deputación, de conformidade co previsto nos artigos 4 e 36 do Real decreto legislativo 3/2015 polo que se aproba o Texto refundido da Lei de emprego.

- Con carácter excepcional, poderase dedicar o 100 % da achega ao programa de gasto corrente e amortización de débeda en supostos de insuficiencia financeira manifesta, considerándose neste situación exclusivamente aqueles concellos nos que se cumpran simultaneamente os seguintes requisitos: que presenten un volume total de capital vivo de endebedamento superior ao 75 % dos seus recursos correntes, remanente de tesourería negativo, inestabilidade orzamentaria, e resultado orzamentario negativo, todos eles respecto ao último exercicio orzamentario liquidado. A achega provincial ao programa de investimentos e ao programa de gasto corrente e amortización de débeda deberá completarse, de resultar insuficiente para o financiamento das actuacións incluídas neles, coas achegas municipais precisas. En consecuencia, poderán incluírse nos ditos programas investimentos e actuacións de importe superior á achega provincial, sempre e cando o concello achegue o financiamento complementario preciso.

II. Convenio de cooperación coa Xunta de Galicia, a FEGAMP e os concellos que dispoñen de grupos de emerxencias supra-municipais.

A través deste convenio subvencionarase o mantemento dos GES nos concellos da provincia que dispoñan deste servizo.

Destínanse a esta finalidade 1.536.000,00 €, consignados no orzamento xeral para o exercicio 2024.

As subvencións tramitaranse nos termos previstos no convenio plurianual aprobado polo Pleno da Deputación.

Para o resto do período obxecto da presente planificación manterase o compromiso de financiamento deste servizo municipal no marco e nos termos do convenio asinado.

III. Programa para co-financiación de adquisición de tractores rozadora e demais apeiros destinados a prevención e extinción de incendios forestais.

Este programa será financiado pola Deputación Provincial e pola Xunta de Galicia en porcentaxes que poden variar e polos Concellos que soliciten a adhesión a este programa achegando estes o IVE correspondente e realizando o procedemento de contratación. Neste procedemento a Deputación Provincial poderá realizar os trámites necesarios de cooperación como pode ser a participación na elaboración de pregos de prescricións administrativa ou técnica adecuados as esixencias do convenio ou a participación si así se solicita, nas mesas de contratación.

A adhesión a este convenio farase mediante petición por escrito á Deputación Provincial e firmarase anualmente por escrupuloso orde de chegada. Os beneficiarios serán preferentemente os concellos que non teñan firmado este convenio anteriormente e no caso de que non houbera outros que o soliciten e si un repetido, incluírase aquel que o asinase anteriormente por orde de antigüidade do máis vello ao máis recente.

A Deputación Provincial elaborará un informe sobre os concellos asinantes e a xustificación da elección destes.

A regulación e condicións aplicables a estas subvencións establécense nos convenios de cooperación a través dos que se concederon, e noutros casos, establecerase nos convenios que se poidan subscribir.

IV. Programa de financiación para construción ou reforma de infraestruturas destinadas a benestar social ou 3ª idade.

Este programa de Cooperación destinarase á construción ou reforma de infraestruturas de carácter público destinadas a programas de benestar social como poden ser centros ocupacionais de discapacitados, casas comunitarias, centros de día, centros de apoio a

drogodependentes, escolas, institutos, centros de formación, residencias xeriátricas de 3ª idade e infraestruturas que sexan de ben social. Neste programa a deputación aportará o importe necesario e dispoñible, dando preferencia ás actuacións que sexan co-financiadas polos concellos ou outras administración e á actuación dos concellos coa poboación máis avellentada.

Este programa estará dotado nos orzamentos do ano 2024 da cantidade de 500.000 €.

V. Programa provincial de asistencia técnica, económica e xurídica aos concellos e mancomunidades en materia de servizos sociais comunitarios (BenOurense).

Este programa – continuación dos xa executados nos exercicios anteriores– canaliza as subvencións tanto para o financiamento do servizo de axuda no fogar básico (destinado a persoas que non teñen efectivamente recoñecido o estatuto de dependencia), para a promoción da dixitalización da xestión do SAF municipal e para a contratación de persoal técnico dos equipos municipais de servizos sociais comunitarios.

A través deste programa lévanse a cabo as accións de cooperación económica e técnica que lle corresponde desenvolver á Deputación Provincial de Ourense en virtude das competencias atribuídas polos artigos 109.1.b) da Lei 5/1997, do 22 de xullo, de administración local de Galicia, 63 da Lei 13/2008, do 3 de decembro, de servizos sociais de Galicia e 31 do Decreto 99/2012, do 16 de marzo, polo que se regulan os servizos sociais comunitarios e o seu financiamento.

A dotación total do programa para o exercicio 2024, segundo o previsto no orzamento xeral da Deputación, é de 1.400.000 euros, que se dedican a subvencionar o servizo básico de axuda no fogar e a contratación de persoal técnico dos equipos municipais de servizos sociais comunitarios, de acordo co establecido na normativa antedita

O programa será aprobado polo Pleno da Deputación ao longo do primeiro trimestre de 2024, tras a súa tramitación conforme ao previsto no artigo 10 da Ordenanza xeral de subvencións, de tal xeito que os concellos e mancomunidades poidan completar o trámite de adhesión ao programa no mes de febreiro. A adxudicación das subvencións levarase a cabo na modalidade de concorrência non competitiva, determinándose a contía das subvencións en virtude de parámetros obxectivos relativos aos servizos sociais prestados polos concellos e mancomunidades beneficiarios.

VI. Programa provincial de asistencia aos concellos e mancomunidades para a xestión de puntos de atención á infancia e outros servizos de atención á infancia (BenOurense Infancia).

Este programa ten por obxecto canalizar as subvencións para gastos de mantemento de puntos de atención á infancia de carácter municipal.

O programa será aprobado polo Pleno da Deputación no primeiro trimestre de 2024, previa a súa tramitación conforme co previsto no artigo 10 da Ordenanza xeral de subvencións. A adxudicación das subvencións levarase a cabo na modalidade de concorrência non competitiva, determinándose a contía das subvencións en virtude de parámetros obxectivos relativos aos puntos de atención á infancia xestionados polos concellos e mancomunidades beneficiarios. No orzamento de 2024 establécese unha aplicación inicial de 230.000 euros.

VII. Subvencións a outras entidades intermunicipais para o financiamento de servizos públicos deficitarios ou de difícil financiamento.

Neste apartado consígnanse no orzamento xeral subvencións nominativas ás mancomunidades

En función das necesidades que se detecten e das dispoñibilidades orzamentarias poderían implementarse outras axudas nesta liña.

VIII. Convenios de cooperación coa Confederación Hidrográfica Miño-Sil e a Confederación Hidrográfica do Douro, e concellos da provincia para diversas actuacións en infraestruturas (abastecemento, saneamento e/ou depuración).

Establécese a posibilidade de conveniar coa Confederación Hidrográfica do Miño-Sil e a Confederación Hidrográfica do Douro, nos termos que se establezan, achegas cuxo destino sexa o investimento en infraestruturas municipais, razón pola que se inclúen na liña de cooperación ás obras e servizos municipais. Estas subvencións complementan o seu financiamento coas achegas da Confederación Hidrográfica con fondos propios e da Unión Europea para a creación destas infraestruturas. A regulación e condicións aplicables a estas subvencións establécese nos convenios de cooperación a través dos que se concederon, e noutros casos, establecerase nos convenios que se poidan subscribir.

IX. Subvencións nominativas a concellos para o co-financiamento de investimentos municipais.

Prevense no orzamento de 2024 unha serie de subvencións nominativas a concellos da provincia para o co-financiamento de diversos investimentos necesarios para a prestación de servizos municipais.

En función das solicitudes e necesidades detectadas na provincia prevese que esta liña se manteña ao longo do período da presente planificación.

Con esta liña prevese acoller determinadas demandas que non teñan encaixe noutras liñas ou formas de financiamento.

Será unha medida excepcional e xustificada para investimentos que por contía ou tipoloxía non se encaixen no Plan CooperOU ou algún dos outros programas de subvencións.

X. Subvencións nominativas a concellos para gastos de mantemento de servizos municipais

Prevense no orzamento de 2024 unha serie de subvencións nominativas a concellos da provincia para o co-financiamento de diversos servizos municipais.

Debido a existencia do Plan CooperOU a tendencia desta liña é a redución significativa desta.

XI. Programa de conservación e mantemento do Patrimonio relixioso e cultural da provincia de Ourense, CONSERVOU.

Este programa ten por obxecto a conservación e mantemento do extenso patrimonio cultural e relixioso existente na nosa provincia.

Faremos convenios cos titulares dos bens, creando unha comisión de análise e decisión dos bens sobre os que se actuará. Esta comisión estará formada por membros das institucións asinantes dos convenios e técnicos que orientarán sobre as actuacións para realizar.

É a intención deste goberno que os asinantes dos convenios sexan organismos públicos que teñan entre os seus obxectivos o mantemento do patrimonio, como poden ser a Xunta de Galicia coa área competente e o Goberno Central, tamén coa área competente na materia. As institucións propietarias dos bens como poden ser os bispados presentes na nosa provincia, o Bispado de Ourense e o Bispado de Astorga, ou outras, deberán ser participes do co-financiamento necesario para as actuacións, na porcentaxe que se considere nos convenios asinados. Quedará aberta a posibilidade da participación dos concellos nestes convenios e cuxa achega poderá ser dende o apartado de gastos do programa COOPEROU.

No caso de bens patrimoniais de titularidade privada, o convenio ou acordo de concesión incluírá a obriga que permita as visitas e acceso ao público en xeral nun horario ou réxime preestablecido.

XII. Programa de cooperación para a adquisición de mobiliario público aos concellos da provincia.

Unha das necesidades que se ten manifestado por parte dos concellos é a dotación de mobiliario.

Neste programa de cooperación a deputación provincial porá a disposición dos concellos a posibilidade de conveniar a adquisición co-financiada de marquesiñas e bancos.

A necesidade de dotar aos concellos deste mobiliario debe facerse dunha maneira uniforme e dotar á provincia dunha imaxe propia deste tipo de mobiliario co obxectivo de embelecer os núcleos poboacionais con mobiliario acorde ás necesidades dos nosos concellos.

XIII. Programa de cooperación para a construción, mantemento e reforma de infraestruturas deportivas.

Nos últimos anos se veñen facendo unha serie de investimentos para a construción ou reforma de infraestruturas deportivas como poden ser a construción de campos de fútbol de herba sintética.

O goberno provincial creará un programa de cooperación que regule a cooperación das actuacións nestas infraestruturas, ou alternativamente consignará subvencións nominativas para esta finalidade, podendo conveniar o co-financiamento xunto con outras administracións públicas, e dando prioridade aos concellos que contan con escolas deportivas de deporte base, tanto si son dependentes do concello, como si dependen de clubs deportivos subvencionados polos respectivos concellos. O anterior enténdese sen prexuízo daqueles concellos que inicien calquera actividade de base e que non dispoñan de infraestruturas axeitadas, e que esta ausencia poida ser un impedimento para a execución de infraestruturas deportivas.

XIV. Programa de Cooperación con concellos menores de 20.000 habitantes titulares de Conservatorios profesionais de Música.

Na nosa provincia temos un conxunto de concellos con “Conservatorios de Música” dependentes, que ofrecen ensinanza reglada e unha serie de titulacións oficiais en grados profesionais de música en diferentes modalidades.

Estes Conservatorios de Música de titularidade municipal, organizan, coordinan e imparten as ensinanzas conducentes á obtención de títulos, diplomas e certificados oficiais que fosen ou sexan autorizados, no ámbito das súas competencias pola Consellería de Educación e ordenación Universitaria, organismos e institucións competentes.

O mantemento desta actividade supón un esforzo económico e organizativo para os concellos titulares, atendendo ademais a alumnos doutros concellos converténdose en actividades

comarcais. O deber do goberno provincial é colaborar coa conservación destes conservatorios e axudar ao fomento e mantemento destas actividades de recoñecido beneficio social e educativo.

A partir do exercicio de 2024, en que se fará unha primeira achega mediante subvención nominativa a cada un deles, elaboraranse unhas bases reguladoras para estas axudas de maneira que se teña en conta alumnos atendidos, modalidades ofertadas e outra variables que se poidan ter en conta.

D.2. Fomento da cultura

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia provincial prevista no artigo 118.d) da Lei 5/1997, do 22 de xullo, de administración local de Galicia.

Os sectores aos que se dirixen as axudas son as entidades locais da provincia, a universidade pública, e a diferentes entidades e institucións culturais de Galicia sen ánimo de lucro.

2.º Obxectivos e efectos que se pretenden coa súa aplicación

Pódense sintetizar nos seguintes:

- Contribuír á realización de actividades culturais e recreativas no conxunto da provincia, con especial atención ao fomento das artes escénicas e musicais e ás actividades culturais no ámbito universitario, como elemento necesario para a configuración dunha oferta cultural e de ocio plural e sostible, aberta ao público en xeral.*
- Colaborar coa Universidade de Vigo garantindo a realización dun amplo programa de actividades culturais e de extensión universitaria no Campus de Ourense.*
- Contribuír ao sostemento da Real Academia Galega, así como a determinadas actividades culturais de carácter senlleiro (actividades de fundacións e outras entidades).*
- Contribuír ao sostemento de fundacións culturais de gran importancia e arraigo na provincia, como as Fundacións Otero Pedrayo, Curros Enríquez, Carlos Casares, Blanco Amor, Insua dos Poetas ou aquelas nas que a Deputación Provincial sexa membro dos seus respectivos padroados.*
- Colaborar co financiamento de actividades culturais promovidas por entidades culturais como son as do Pen Club de Galicia, a Coral de Ruada, o Liceo de Ourense ou Sarabela Teatro ou similares.*

3.º Prazo necesario para a súa consecución

A concesión das subvencións correspondentes a esta liña de actuación deberá completarse como máximo e como regra xeral antes do 31 de xullo do ano que corresponda, sen prexuízo dos menores prazos establecidos nas bases reguladoras ou convenios específicos que a integran. No caso das subvencións para fomento de actividades escénicas e musicais, a concesión das subvencións deberá completarse como máximo antes do 1 de decembro. A execución das actuacións subvencionadas deberá realizarse integramente no exercicio que corresponda.

4.º Custos previsibles para a súa realización e fontes de financiamento

As subvencións financiaranse integramente con fondos propios da Deputación Provincial, sen prexuízo das achegas realizadas polos propios beneficiarios, ou ben con fondos doutras administracións públicas captados por estes. Estes fondos poderanse ampliar en sucesivas modificacións ao longo do ano dependendo das necesidades orzamentarias de cada actuación concreta.

5.º Plan de acción

As subvencións que integran esta liña instrumentaranse a través dos seguintes procedementos:

I. Concurso de subvencións para fomento das artes escénicas e musicais (Plan Tarazona)

A finalidade destas subvencións é o financiamento de actuacións escénicas e musicais de carácter gratuíto e abertas ao público en xeral, promovidas por entidades locais, entidades sen ánimo de lucro ou comisións de festexos.

Igualmente, poderán ser obxecto de financiamento a realización de festivais, ciclos, mostras ou actividades análogas relativas a actuacións escénicas e musicais, promovidas por entidades locais ou entidades sen ánimo de lucro.

O procedemento será o de concorrência non competitiva, permitíndolles aos beneficiarios (entidades locais, asociacións veciñais, comisións de festexos) seleccionar libremente a actividade escénica ou musical que desexen, de entre a oferta integrada por todas as agrupacións artísticas que se adhiran ao sistema. As bases garantirán unha estrita neutralidade da administración pública na selección dos espectáculos subvencionados, quedando determinada a concesión de subvencións exclusivamente pola orde cronolóxica de solicitudes e a dispoñibilidade das agrupacións artísticas adheridas.

As bases do concurso deberán ser aprobadas pola Xunta de Goberno no primeiro trimestre do exercicio.

No caso do financiamento de festivais, ciclos, mostras ou actividades análogas, o procedemento será o dun concurso para a concesión de subvencións que poderá admitir a modalidade de concorrência competitiva ou non competitiva.

A dotación prevista no orzamento de 2024 para esta finalidade é de 150.000,00 euros.

II. Programa de cooperación cos concellos para o co-financiamento da rede provincial de espazos culturais e programación coordinada de actividades a nivel provincial (REAOU).

O obxecto deste Programa de cooperación é o de co-financiar e cooperar conxuntamente cos concellos de menos de 20.000 habitantes no fomento e a difusión das artes escénicas e da música na provincia, a través da Rede de espazos culturais (auditorios, casas de cultura e centros multiusos) da provincia de Ourense, sempre que dispoñan dun espazo axeitado para o desenvolvemento da actividade escénica e asuman a programación de, polo menos, un espectáculo bimestral nos ditos espazos.

O importe previsto no orzamento de 2024 para este Programa é de 150.000,00 €.

III. Subvencións para festivais e actos similares de marcado carácter senlleiro na provincia.

Establécese a posibilidade de instrumentar a través de diferentes subvencións nominativas a entidades locais para a organización de festivais e actos culturais análogos de marcado carácter senlleiro e consolidado no ámbito cultural da provincia.

IV. Concurso de subvencións para realización de actividades culturais e recreativas

A finalidade destas subvencións é o financiamento da realización de todo tipo de actividades culturais ou recreativas, promovidas por entidades sen ánimo de lucro.

O procedemento será o de concorrência competitiva. Os criterios de valoración incentivarán aquelas actividades que contén cun maior impacto social, así como a capacidade de autofinanciamento da entidade beneficiaria; igualmente, incentivaranse as actividades culturais que se estimen de especial interese polo seu carácter senlleiro, especial calidade ou pola súa incidencia na protección de tradicións culturais da provincia.

As bases do concurso deberán ser aprobadas pola Xunta de Goberno no primeiro cuatrimestre do exercicio. A contía reflectida no orzamento de 2024 é de 200.000 €.

V. Convenio coa Universidade para a realización de actividades culturais

A través dun convenio coa Universidade de Vigo regularase a concesión dunha subvención nominativa, por importe máximo de 220.000,00 €, destinada a financiar a realización de actividades culturais e de extensión universitaria no campus de Ourense. Poderase incluír entre as finalidades subvencionadas a realización de programas de apoio á mobilidade dos estudantes do campus e a grupos de investigación do Campus de Ourense.

As concretas condicións da subvención regularanse no convenio, que deberá ser obxecto de negociación e aprobación pola Xunta de Goberno no primeiro trimestre do ano que corresponda.

Estudarse a posibilidade de conveniar en termos similares coa UNED de Ourense.

VI. Liña de axudas a entidades e fundacións de carácter senlleiro e de especial relevancia da nosa provincia.

Durante o mandato elaborárase unha liña de axudas por concorrencia competitiva para aquelas fundacións ou asociacións das que a Deputación Provincial sexa patrón ou membro dela. Terase en especial consideración a figura ou relevancia da propia fundación e as actividades para realizar.

VII. Subvencións nominativas a outras entidades.

Detállanse a continuación algunhas das previstas no orzamento aprobado para o orzamento do ano 2024.

- *Real Academia Galega.*
- *Achega ao premio Otero Pedrayo.*
- *Fundación Eduardo Blanco Amor.*
- *Fundación Otero Pedrayo.*
- *Pen Clube de Galicia.*
- *Coral da Ruada.*
- *Fundación Insúa dos Poetas.*
- *Fundación Curros Enríquez.*
- *Fundación Carlos Velo.*
- *Liceo de Ourense.*
- *Fundación Vicente Risco.*

Esta liña de axudas irase diminuindo coa creación dun instrumento con criterios obxectivos de reparto.

D.3. Fomento do deporte

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia prevista no artigo 118.d) da Lei 571997, do 22 de xullo, de administración local de Galicia, así como na Lei do deporte de Galicia.

Os sectores aos que se dirixen as axudas son as entidades locais, entidades deportivas sen ánimo de lucro, sociedades anónimas deportivas, asociacións veciñais e deportistas individuais cualificados.

2.º Obxectivos e efectos que se pretenden coa súa aplicación

Pódense resumir nos seguintes:

- Garantir o mantemento da actividade das principais entidades deportivas de Ourense, con especial atención ao deporte de base.*
- Garantir a existencia dunha actividade plural e diversificada de actividades deportivas na provincia de Ourense, especialmente de actividades deportivas abertas ao deporte de base (con programas como o das Copas Deputación) e actividades abertas ao público en xeral, baseadas nos conceptos de “deporte para todos” e “deporte – saúde”.*
- Promover e incentivar a actividade dos deportistas individuais ourensáns especialmente destacados nas súas disciplinas deportivas.*

3.º Prazo necesario para a súa consecución

A concesión das subvencións correspondentes a esta liña de actuación deberá completarse como máximo antes do 31 de xullo do ano que corresponda, sen prexuízo dos menores prazos establecidos nas bases reguladoras ou convenios específicos que a integran, e da especialidade na modalidade de eventos deportivos xa que se implementará un modelo de bases que permita a solicitude de eventos en dúas convocatorias, ao longo do ano.

4.º Custos previsibles para a súa realización e fontes de financiamento

A contía destinada a esta liña de subvencións nos orzamentos de 2024 achégase a 903.000 €, financiados integramente con fondos propios da Deputación Provincial de Ourense, sen prexuízo da posibilidade de que os beneficiarios complementen esta achega con fondos propios ou obtidos doutras administracións públicas.

5.º Plan de acción

As subvencións que integran esta liña de actuación instrumentaranse a través das seguintes accións:

I. Concurso de subvencións a entidades deportivas

A finalidade deste concurso é a concesión de subvencións a entidades deportivas sen ánimo de lucro para o sostemento do seus gastos de funcionamento e, máis en concreto, dos gastos derivados da súa participación nas competicións deportivas oficiais. A dotación para estas finalidades nos orzamentos de 2024 é de 350.000 euros.

As bases reguladoras e a convocatoria deste concurso deberá aprobalas a Xunta de Goberno no primeiro trimestre de 2024. As bases terán en conta, entre outros criterios de valoración, a realización de actividades de deporte base, feminino e de discapacitados, e así como a incidencia social da actividade do club e a racionalidade da súa xestión económica, con especial atención á súa capacidade de financiamento con cargo a ingresos privados (coas de socios, patrocinios privados...).

As subvencións correspondentes a esta acción concederanse mediante procedemento de concorrência competitiva.

II. Subvención ao Club Ourense Baloncesto.

A finalidade desta subvención é contribuír ao sostemento do Club Ourense Baloncesto. Non obstante, a subvención quedará condicionada á realización de actividades de fomento do deporte base por parte da entidade beneficiaria.

Prevense 250.000,00 euros para esta finalidade, cantidade idéntica á de exercicios anteriores. A subvención concederase como subvención nominativa en atención á especial importancia desta entidade deportiva na provincia.

III. Subvención á Asociación Deportiva-Cultural Ribeiro.

A finalidade desta subvención é contribuír ao sostemento da Asociación Deportiva-Cultural Ribeiro. Non obstante, a subvención quedará condicionada á realización de actividades de fomento do deporte base por parte da entidade beneficiaria.

Prevense 40.000,00 € para esta finalidade.

A subvención concederase como subvención nominativa, en atención á categoría competitiva na que milita o equipo de balonmán sénior masculino Rodosa - Carnes do Ribeiro-Ourense provincia termal.

IV. Subvención ao Rally de Ourense

A finalidade desta subvención é contribuír á realización deste importante evento, de enorme importancia económica, social e deportiva. Prevese unha subvención por importe 53.000 €, que se concederá con carácter nominativo.

V. Concurso de subvencións para as Copas Deputación

A finalidade desta subvención é garantir o mantemento das Copas Deputación, como competición deportiva de enorme tradición na provincia e orientada fundamentalmente cara ao deporte de base. A dotación para estas finalidades nos orzamentos de 2024 é de 120.000 €.

As bases reguladoras e a convocatoria deste concurso deberá aprobalas a Xunta de Goberno no primeiro trimestre de 2024. As bases terán en conta, entre os criterios de valoración, a incidencia social da competición, a súa orientación ao deporte de base e a celebración en municipios diferentes da capital, entre outros factores.

As subvencións correspondentes a esta acción concederanse ordinariamente mediante o procedemento de concorrència competitiva, con excepción das Copas Deputación de fútbol e fútbol sala, que polo seu arraigo e dimensión nesta provincia, serán obxecto de financiamento a través de sendas subvencións nominativas nos termos que estableza o pleno da Deputación.

VI. Concurso de subvencións para eventos deportivos

A finalidade destas subvencións é contribuír ao mantemento dunha actividade deportiva ampla, orientada ao público en xeral e baseada principalmente nos conceptos de deporte – saúde e deporte para todos. As accións subvencionadas poderán ser promovidas polas entidades deportivas, entidades sen ánimo de lucro ou asociacións veciñais.

A dotación para estas finalidades nos orzamentos de 2024 é de 60.000 euros para o fomento do deporte polas entidades anteditas.

As bases reguladoras e a convocatoria deste concurso deberá aprobalas a Xunta de Goberno no primeiro trimestre de cada ano.

VII. Concurso de subvencións a deportistas individuais cualificados

A finalidade destas subvencións é incentivar a actividade dos deportistas ourensáns individuais que se destacasen especialmente na temporada deportiva, tendo en conta ademais o conxunto da súa traxectoria.

A dotación para estas finalidades nos orzamentos de 2024 é de 30.000,00 €.

As bases reguladoras e a convocatoria deste concurso para o ano 2024 serán aprobadas pola Xunta de Goberno no primeiro trimestre de 2024.

As subvencións correspondentes a esta acción concederanse mediante procedemento de concorrència competitiva.

VIII. Outras subvencións nominativas.

En función das solicitudes e necesidades detectadas na provincia prevese que esta liña se manteña ao longo do período da presente planificación, co obxectivo de acoller determinadas demandas que non teñan encaixe noutras liñas ou formas de financiamento, así como cooperar cos clubs da provincia que destaquen e compitan en ámbitos superior ao autonómico e requiran de maior apoio institucional.

IX. Entidades deportivas de fomento do deporte base.

A finalidade desta liña de subvencións é incentivar a actividade do deporte base ourensán mediante concorrencia competitiva ou nominativa en casos xustificados e excepcionais.

D.4. Reto demográfico.

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia xeral prevista no artigo 109 d) da Lei de administración local de Galicia do fomento e administración dos intereses peculiares da provincia.

Os sectores aos que se dirixen son, por unha banda, aos veciños e veciñas da provincia que durante o ano 2024 e sucesivos teñan un fillo ou filla, ou teña constituída a tutela ou adopción dun neno ou nena (Programa CheogOU), e por outra as persoas físicas o xurídicas que leven a cabo proxectos empresariais e/ou de auto emprego en municipios rurais en declive demográfico da provincia (Programa EmprendOU).

Ademais do anterior, en moitas das bases de subvencións dirixidas ás EELL da provincia introdúcese como criterio de ponderación a “prioridade demográfica dos concellos”, a cal se obtén en función dos criterios de poboación actual, situación xeográfica, perda/suba de poboación, densidade demográfica, índice de avellentamento e taxa de natalidade.

2.º Obxectivos e efectos que se pretenden coa súa aplicación

Como obxectivo inmediato está o de incorporar na regulación das subvencións provinciais a “perspectiva de reto demográfico”, facendo a esta Deputación participe da Estratexia Nacional fronte o reto demográfico e seguindo algunhas das medidas xurdidas do Documento de Acción elaborado pola Comisión de despoboamento constituída no seno da FEMP.

O obxectivo final é o de frear o descenso de poboación na provincia e, particularmente nos concellos máis afectados, tentando fomentar a natalidade e o emprendemento rural como elementos que axuden a fixar poboación.

3.º Prazo necesario para a súa consecución

A concesión das subvencións realizarase ao longo de todo o ano 2024, e sucesivos, se hai continuidade nos orzamentos provinciais.

4.º Custos previsibles para a súa realización e fontes de financiamento

A dotación total para estas finalidades no exercicio 2024 é de 550.000,00 €.

5.º Plan de acción

A concesión das subvencións incluídas nesta liña levarase a cabo a través dos seguintes programas:

I. Programa ChegOU.

Constitúe o obxecto deste Programa a regulación das axudas que a Deputación de Ourense, a través da Área de Benestar, lle outorgará, mediante concorrència non competitiva, á persoa que durante o ano 2024 teña un fillo ou filla, teña constituída a tutela ou adopción dun neno ou nena.

A subvención á que poderán acceder as persoas solicitantes será a que lle corresponda segundo a consideración, en grado, do concello en cuxo rexistro civil conste inscrito o/a menor que motiva a solicitude.

A dotación total do Programa para o exercicio 2024 é de 400.000,00 €.

II. Programa EmprendOU.

Constitúe o obxecto deste programa a concesión das subvencións que outorgue a Deputación Provincial de Ourense, en réxime de concorrència non competitiva, a persoas físicas que leven a cabo proxectos empresariais e/ou de auto emprego en municipios rurais en declive demográfico da provincia de Ourense durante o exercicio 2024.

Estes períodos terán que cumprirse antes do 31 de decembro do ano correspondente, data límite ata a que se subvencionarán os proxectos presentados.

O importe total do Programa dependerá da disposición orzamentaria e da posible co-financiación do Fondo Social Europeo. No orzamento do 2024 é de 150.000 €.

D.5 Fomento do benestar social

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia prevista no artigo 118 da Lei 5/1997, do 22 de xullo, de administración local de Galicia, e 36.1. d) e e) da Lei reguladora das bases de réxime local, ao considerar que o fomento da prestación de servizos sociais constitúe un interese peculiar da provincia de Ourense e contribúe ao seu desenvolvemento social, dadas as súas características sociais e demográficas, interese especificamente definido en

desenvolvemento da previsións xenérica das normas citadas polo artigo 4.2.f) da Ordenanza xeral de subvencións.

Os sectores aos que se dirixen son as entidades sen ánimo de lucro que presten servizos sociais na provincia, así como a persoas físicas beneficiarias do Programa de termalismo social.

Quedan fóra desta liña. Por ter sido xa incluídos noutras precedentes, os programas de cooperación cos concellos en materia de servizos sociais e o programa de fomento da natalidade.

2.º Obxectivos e efectos que se pretenden coa súa aplicación

O obxectivo fundamental que persegue esta liña de subvencións é contribuír ao mantemento dos servizos sociais (complementarios dos xestionados polo sector público) que son prestados na provincia por entidades sen ánimo de lucro. Complementariamente, resérvase unha partida para posibles investimentos por parte deste tipo de entidades.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como regra xeral e como máximo antes do 31 de xullo do ano que corresponda, sen prexuízo dos menores prazos establecidos nas bases reguladoras ou convenios específicos que a integran. A execución das actuacións subvencionadas deberá realizarse integramente no exercicio.

4.º Custos previsibles para a súa realización e fontes de financiamento

A dotación total prevista para esta liña é de 550.000 euros, irán destinados á concesión de subvencións a entidades sen ánimo de lucro para a prestación de servizos sociais mediante procedementos de concorrència competitiva e o desenvolvemento do Programa de Termalismo Social.

5.º Plan de acción

A concesión das subvencións incluídas nesta liña instrumentarase a través das seguintes accións:

I. Concurso de subvencións para entidades sen ánimo de lucro que presten de servizos sociais

Esta acción consistirá na concesión de subvencións a entidades sen ánimo de lucro que presten servizos sociais na provincia de Ourense, e dotarase con 300.000,00 euros. As subvencións concederanse mediante procedementos de concorrència competitiva, e as bases reguladoras deberán ser aprobadas pola Xunta de Goberno no primeiro trimestre do ano que

corresponda. Os criterios de valoración terán en conta, entre outros factores, a complementariedade dos servizos prestados cos xestionados polas administracións públicas e a súa incidencia social no territorio e nos colectivos afectados.

II. Fondo para subvencións de emerxencia social

Os orzamentos de 2024 reservan unha partida de 15.000,00 euros sen adscrición específica. Esta partida poderá destinarse a subvencións de emerxencia social, en función de necesidades que poidan detectarse ao longo do exercicio, que poderán tramitarse como subvencións nominativas ou directas, sempre que se dean os supostos previstos en cada caso pola Ordenanza xeral de subvencións. Esta partida poderá empregarse, igualmente, para atender obrigas sobrevidas como consecuencia da estimación de recursos interpostos contra os actos de concesión de subvencións do exercicio anterior.

III. Concurso de subvencións para fomento do termalismo social.

Mediante esta acción, concederanse subvencións a persoas físicas para a realización de estancias, e recepción de tratamentos terapéuticos (dermatolóxicos, respiratorios, e reumatolóxicos) en establecementos balnearios da provincia de Ourense.

O procedemento será xestionado pola Deputación, mediante concorrencia competitiva, efectuándose diversas convocatorias ao ano en función dos períodos de actividade dos establecementos balnearios. Os establecementos balnearios terán a consideración de entidades colaboradoras, ben directamente, ou ben a través das súas asociacións representativas.

As bases reguladoras da concesión das axudas terán en conta criterios de idade e capacidade económica dos beneficiarios.

IV. Outras subvencións nominativas.

En función das solicitudes e necesidades detectadas na provincia prevese que esta liña se manteña ao longo do período da presente planificación, co obxectivo de acoller determinadas demandas que non teñan encaixe noutras liñas ou formas de financiamento.

D.6 Fomento do desenvolvemento económico da provincia

1.º Áreas de competencia afectadas e sectores aos que se dirixen as axudas

Esta liña de subvencións enmárcase na competencia provincial de cooperación no fomento do desenvolvemento económico da provincia, prevista no artigo 36.1.d) da Lei de bases de réxime local. O exercicio destas competencias provinciais instrumentase a través do Instituto

Ourensán de Desenvolvemento Económico e Social (INORDE) e desde a propia Deputación provincial.

Os sectores afectados por esta liña serán os concellos e o sector empresarial da provincia de Ourense en xeral, en particular o que ten por obxecto a produción, promoción e distribución de produtos propios da provincia non susceptibles de deslocalización e o sector termal.

2.º Obxectivos e efectos que se pretenden coa súa aplicación

Poden resumirse nos seguintes:

- Contribuír ao crecemento da economía provincial mediante a concesión de subvencións aos concellos para a promoción de produtos propios da provincia non susceptibles da deslocalización.*
- Contribuír ao desenvolvemento económico da provincia, cos aportacións á Fundación Expourense (da que o INORDE é socio fundador), para o financiamento de feiras e exposicións que celebren.*
- Fomentar o desenvolvemento da creación e apoio ás actividades das diferentes asociacións de comerciantes da provincia de Ourense.*

3.º Prazo necesario para a súa consecución

A concesión das subvencións correspondentes a esta liña de actuación deberá completarse como regra xeral e como máximo antes do 1 de decembro do ano que corresponda, sen prexuízo dos menores prazos establecidos nas bases reguladoras ou convenios específicos que a integran. A execución das actuacións subvencionadas deberá realizarse integramente no exercicio.

4.º Custos previsibles para a súa realización e fontes de financiamento

O importe destinado a estas finalidades nos orzamentos da Deputación Provincial e do Inorde para o exercicio 2024 supera os 300.000,00 €.

O financiamento destes importes realízase con fondos propios da Deputación e do Inorde, sen prexuízo da posibilidade de que os beneficiarios complementen estas achegas con fondos propios ou procedentes doutras administracións públicas.

5.º Plan de acción

Esta liña de subvencións instrumentarase a través das seguintes accións:

I. Concurso de subvencións a concellos para accións de promoción de produtos propios da provincia de Ourense

Mediante esta acción, concederanse subvencións a concellos para a realización de accións de promoción de produtos propios da provincia non susceptibles de deslocalización. O procedemento de concesión de subvencións será xestionado polo Inorde, mediante concorrencia competitiva, debendo aprobarse as bases reguladoras do concurso no primeiro cuadrimestre do ano que corresponda. As bases terán en conta a incidencia socioeconómica das accións previstas. A dotación orzamentaria para esta acción será de 75.000,00 euros.

II. Concurso de subvencións para o financiamento de accións de dinamización e promoción do comercio local realizadas por asociacións de comerciantes da provincia de Ourense e por asociacións empresariais municipais ou comarcais da provincia de Ourense das que formen parte os comerciantes.

O obxecto deste concurso é a concesión, por parte do INORDE, mediante convocatoria pública, e a través do procedemento de concorrencia competitiva, de subvencións para o financiamento de accións de dinamización e promoción do comercio local realizadas por asociacións de comerciantes da provincia de Ourense e tamén por asociacións empresariais municipais ou comarcais da provincia de Ourense das que formen parte comerciantes.

Considéranse accións de dinamización e promoción do comercio local, entre outras, as exposicións e certames orientados á comercialización de produtos locais e as campañas dirixidas á captación de socios e potenciais clientes.

Poderán ser beneficiarios das subvencións concedidas ao amparo desta convocatoria asociacións de comerciantes da provincia de Ourense e tamén asociacións empresariais municipais ou comarcais da provincia de Ourense das que formen parte comerciantes.

III. Subvención á Fundación Feiras e Exposicións de Ourense (Expourense).

Sen prexuízo da achega da cota correspondente a esta Fundación, da que o INORDE é socio fundador, preténdese colaborar cos obxectivos desta Fundación no ámbito da promoción de actividades industriais, comerciais, técnicas agrícolas, gandeiras, gastronómicas, turísticas ou culturais en Ourense, de ámbito internacional, nacional, autonómico, provincial ou local, tanto de carácter xeral como monográfico, enfocada a determinados sectores profesionais ou abertas ao público en xeral, polo que se poderán implementar subvencións a esta Fundación para a realización de actividades concretas de interese provincial.

IV. Outras subvencións nominativas do INORDE para o desenvolvemento económico.

Por esta vía poderán subvencionarse accións que non teñan encaixe noutras convocatorias e que polo seu carácter singular supoñan un pulo e se consideren unha aposta polo

desenvolvemento económico provincial, como son as previstas no Orzamento deste organismo autónomo destinada á Confederación de Empresarios de Ourense, así como outras que se poidan implementar ao longo do período da planificación de xeito excepcional e por causas xustificadas.

O anterior, establécese sen prexuízo de potenciar as subvencións do INORDE en réxime de concorrencia competitiva destinadas a Asociacións de comerciantes e/ou empresarios (previstas no apartado II do Plan de acción), para actividades de promoción nos seus respectivos ámbitos, valorándose criterios relativos ao número de asociados ou o número de campañas de promoción, entre outras, todo elo en función das disponibilidades orzamentarias anuais do INORDE.

D.7 Fomento do asociacionismo veciñal

1.º Áreas de competencia afectadas e sectores aos que se dirixen as axudas

Esta liña de subvencións enmárcase na competencia provincial de fomento dos intereses peculiares da provincia, prevista no artigo 118.d) da Lei de administración local de Galicia e 36.1.e) da Lei de bases de réxime local.

Os sectores afectados por esta liña serán as asociacións veciñais.

2.º Obxectivos e efectos que se pretenden coa súa aplicación

Potenciar o movemento veciñal, a través das súas asociacións, como instrumento de participación cidadá antes as administracións locais e como entidades xestoras de actividades de interese social, deportiva, cultural ou medioambiental.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como regra xeral e como máximo antes do 1 de decembro do ano que corresponda, sen prexuízo dos menores prazos establecidos nas bases reguladoras ou convenios específicos que a integran. A execución das actuacións subvencionadas deberá realizarse integramente no exercicio.

4.º Custos previsibles para a súa realización e fontes de financiamento

Existe unha previsión inicial de 50.000,00 € nos orzamentos para 2024, destinados ao financiamento dos gastos correntes das federacións de asociacións veciñais.

No primeiro semestre de 2024 habilitarase mediante unha modificación orzamentaria con cargo ao remanente de tesourería, unha partida de 100.000,00 € con destino ao

financiamento de gastos de investimento de asociacións veciñais, mediante concurso público e con concorrencia competitiva.

O financiamento desta liña, en todo caso, realizarase con fondos propios da Deputación, e sen prexuízo da posibilidade de que os beneficiarios complementen estas achegas con fondos propios ou procedentes doutras administracións públicas.

5.º Plan de acción

Esta liña de subvencións instrumentarase a través de concursos de concesión de subvencións a federacións de asociación veciñais por un lado e ás propias asociacións veciñais polo outro.

O procedemento poderá ser tanto o de concorrencia competitiva como o de concorrencia non competitiva, podendo tamén implementarse a través da concesión de subvencións de carácter nominativo, sempre que se respecten os límites establecidos na Ordenanza xeral de subvencións e se motiven estas. O importe inicial consignado no orzamento ascende aos 50.000,00 euros para o financiamento desta liña.

E) Réxime de seguimento e avaliación das diferentes liñas de subvencións do Plan Estratéxico de Subvencións 2024-2027

No primeiro cuadrimestre seguinte ao remate do ámbito temporal do vixente Plan estratéxico, a Área de Administración Xeral emitirá un informe sobre o seu grao de execución, no que se analizarán as principais incidencias e desviacións experimentadas, e que poderá conter propostas de mellora dos plans sucesivos. Deste informe daráselle conta ao Pleno da Deputación na primeira sesión ordinaria que realice, e o seu contido terase en conta para a actualización da planificación estratéxica desta Deputación Provincial.

5º.- Publicar o texto íntegro do Plan estratéxico de subvencións da Deputación Provincial de Ourense e do INORDE para o período 2024-2027 no BOP de Ourense e na sede electrónica provincial, para os efectos oportunos.

4º.- MOCIÓN DO GRUPO POPULAR RELATIVA AO DESMANTELAMENTO DA SEGURIDADE NA PROVINCIA DE OURENSE.-

Dª Ana Patricia Torres Madureira, do Grupo Popular, procede a dar lectura e a expoñer o contido da moción.

D. Bernardo Varela López, do BNG, comeza indicando que en todo caso a referencia da moción á Garda Civil debería ser á Policía Autonómica de Galicia, recordando que o goberno galego debe asumir as competencias que nesta materia lle permite o Estatuto de Autonomía de

Galicia. Engade que é necesario unha reestruturación das instalacións da Garda Civil e que o importante é que existan patrullas operativas e non tanto que haxa postos cun único garda civil en horario de mañá. Conclúe sinalando que, en xeral, pode coincidir con algunhas das peticións da moción, pero insiste en que o importante é que existan patrullas móbiles e operativas que dean un servizo rápido e eficaz, especialmente no rural.

D. Aurentino Alonso Araujo, do Grupo Socialista, sinala que no debate do Pleno achegará datos sobre esta moción, se ben sorpréndelle que se fale de desmantelamento como se estiveran falando de sanidade. Sinala que a Garda Civil non acostuma a fallar e cando se a necesita sempre acude, pero hai que ten en conta que debe adaptarse á realidade do século XXI.

D^a. Ana Patricia Torres Madureira, do Grupo Popular, sinala que non se pode comparar o que pasa no ámbito sanitario, onde non se pecha ningún centro de saúde senón mais ben ao contrario, co que está pasando cos cuarteis da Garda Civil na nosa provincia, que cada vez son máis escasos. Sinala que no ámbito rural aumentaron os delitos de roubos, estafas e violencia de xénero, polo que é moi importante a presenza da Garda Civil. Sinala que nesta provincia hai prazas de gardas civís, polo que debería demandarse que se cubran ou incluso se reforcen.

D. Bernardo Varela López, do BNG, insiste en que o importante debe ser a implantación de patrullas plenamente operativas no ámbito territorial axeitado, xa que a prontitude da resposta de actuacións é a clave para frear os delitos.

Non se producen máis intervencións e co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

- Instar ao Goberno de España a:
 - 1.- Apoiar e recoñecer o labor que realiza a Garda Civil, comprometéndose a manter a súa presenza en todos os cuarteis da Garda Civil na provincia de Ourense, dotándoa de máis medios persoais e materiais.
 - 2.- Colaborar cos concellos da provincia de Ourense no mantemento da seguridade cidadá.
 - 3.- Proceder á atención presencial dos ourensáns nos cuarteis da provincia de Ourense as 24 horas do día.
 - 4.- Paralizar urxentemente o traslado da Unidade de Fronteiras e Fiscal de Lobios.
 - 5.- Non pechar ningún posto na provincia de Ourense.

6.- Reforzar de maneira urxente os postos da Garda Civil en todas aquelas zonas que carecen de Policía Local.

7.- Ocupar as prazas totais que aparecen no catálogo de postos de traballo para a provincia de Ourense e que están libres na actualidade.

8.- Elaborar un plan de incentivo profesional e económico para que os axentes queiran ocupar os postos de baixa demanda no medio rural.

9.- Empregar urxentemente as vacantes de persoal en reserva sen destino, para dotar de máis axentes á provincia de Ourense.

5º.- MOCIÓNS DE URXENCIA.- Non se presentan

6º.- ROGOS E PREGUNTAS.- Non se formulan

E, ás 17.13 horas, dáse por finalizada a reunión, redactándose a presente acta que se asinará electronicamente. Dou fe.